



15. April 2024

UPA2024/155

Inatsisartut upernaakkut ataatsimiinneranni Siverth K Heilmann Atassut Inatsisartut suleriaasianni § 33 toqqammavigalugu qulequttamik imaattumik oqaluuserisassanngortitsivoq; **Royal Greenland suleqatigalugu saarullinnik uumatitsivinnik amerlanerusunik pilersitsisoqarnissaanik pilersaarusiortoqarnissaanik Naalackersuisut peqquneqarnissaannik Inatsisartut aalajangiiffigisassaattut siunnersuut.**

Siumumiit siunnersuuteqartoq siunnersuutaanut qutsavigaarput.

Imatullu Siumumiit oqaaseqarfigissavarput.

Siunnersuuteqartup siunnersuuteqarnermini toqqammavilersuutai Siumumiit paasilluarsinnaavavut, isumaqatigalutigillu.

**Suliniut Nutaaq** 2016-mi Royal Greenlandip aallartissimasaa massakkumut aalisartunit uumatitsivissortunit amerliartuinnartunit peqataaffigineqartoq naalackersuisut akissuteqarnermini erseqqissarpaat.

Qularutissaanngilaq uumatitsivinnik atuisut amerliartuinnartillugit, aammalu saarullinnik aalisartut uumatitsivissornermut peqataasut siammariartuinnartillugit, uumatitsivinniittuutit aningaasarsissutigisinnaanerannut piffissamik sivilunerusumik utaqqisarneq kingunerisartussaassagaa naatsorsuutigisariaqassammat. Tamannalu soorunami saarullinnianut kipiluttunartuusarpoq, nalusarpaammi qaqugu uumatitsivimmiittuutitik aningaasarsissutigissanerlugit. Taamaattumik aalisartut Royal Greenlandillu akunnerminni periarfissat periutsillu qanoq ittut aaqqiiniarnermi piumasaqaataassanersut isumaqatigiissutigalugit sinnerfilersuisariaqarput.

Siunnersuuteqartup aammalu Naalackersuisut akissuteqarnerminni uumatitsivinniittunik toqusoortoqartarnera oqaatigivaat. Ajoraluartumilli saarullit toqusoortugineqartut qanoq annertutiginerannik nalunaarsukkanik takusassaartoqarani. Oqaatigineqartarlunili ataasiakkaani annertuumik toqorartoortoqartoq, kisitsisaatigineqaratilli.

Maluginiakkatta ilagivaat aalisartut uumatitsivinnik atuisut periarfissap taassuma namminerminnut aningaasarsionnerminnut annertuumik iluaqutaasoq, kisianni aamma paarlattuanik oqariartortoqartarluni.

Mannali qularnaappoq, piumasaqaatit pitsaasumik malillugit uumatitsivinni immiisarneq aqulluaraanni, aammalu kuuit sumiiffinni tamani aasaanera tamaat kuuttuartut ningorlugit uumatitsivinnik inissiigaanni toqorartoqarsinnaanera annikinnerpaaffianiitinneqarsinnaasoq.



Siunnersuuteqartut siunnersuutaa paasilluaraluarlutigu, aalisartut uumatitsivissortut Royal Greenlandillu akunnerminni oqaloqatigiinnermik annertusiartuinnartumik ingerlatsinerisigut uumatitsivinnik amerliartortitsisoqarsinnaanera, (taamatummi oqaatigineqarmat) ineriartortinneqartuassasoq naatsorsuutigilluinnarparput.

Taamatut oqaaseqarluta Naalackersuisut siunnersuutigineqartumut allannguutissatut siunnersuutaanut taperserpavut.

Karl Tobiassen  
Siumut